



Moa sevis i kam long BSP...

BENK Saut Pasifik (BSP), i lonsim nupela fainens han bilong en long dispela wik long Pot Mosbi, bilong helpim ol kastoma long lukautim ol aset fainens bilong ol.

"Dispela nupela hap han em BSP Fainens (PNG) Ltd em bai givim nupela na gutpela moa sevis," BSP Sif Eksektiv Opisa, Robin Fleming i tok.

BSP fainens bai givim aut ol narapela prodak olsem tem diposit, fainens lis na komesol lon (dinau).

Moa stori long pes 3

CEO bilong BSP, Robin Fleming toktok long taim ol i opim nupela BSP Fainens opis. *Poto: BSP Media*

INSAIT



8-pela pes bi-long Sif Seketeri bi-long Palamen Insait!

P9,10,11, 12,17,18,19,20

Tupela wik tasol long rausim dai bodi long PMGH Mog

- P2

BSP kamapim nupela finens opis

- p3



Fri edukesen fi kamapim hevi

...Projek fi i save helpim skul operesen

FRI edukesen na fri projek fi i kamapim hevi long spes na lainim bilong ol sumatin long sampela skul long kantri we i gat planti sumatin pinis, na planti moa long narapela skul tu i laik trense i go long ol.

Wanpela long ol em Wardstrip Praimeri skul insait long Nesenel Kapitel Distrik.

Wardstrip Praimeri skul i gat bikpela namba olsem 3200 sumatin long dispela yia.

Dispela em i bikpela namba stret winim mak bilong

ol narapela yia na bai givim bikpela hevi long ol tisa na tu ol sumatin long kisim gutpela save.

Joylyne Karato UPNG sumatin na James Kila i raitim

I go moa long pes 2...

TAMPARA!

Air Niugini is proud to resume services to Aropa, Kieta.
3 Weekly Flights - Tuesday, Thursday and Saturday.

Effective 20th December 2014

 **Air Niugini**
www.airniugini.com.pg
EXCLUSIVE CARRIER FOR THE 2015 PACIFIC GAMES

Call Toll Free on **180 3444** or contact your nearest Air Niugini Travel Centre or Travel agent for further details. Schedule - Tue & Sat: Pom-Kie (direct), Thu: Pom-Kie (via Rabaul).





RABAU
KIETA
PORT MORESBY

Koki maket develop na i win tru

Sape Metta i raitim

KOKI maket long Nesenel Kapitel Distrik em i wanpela maket we i stap long histori buk bilong Papua Niugini, long wanem, long koloniel taim, gavman bilong Australia i bin kamapim kapitol

Fri edukesen fi i kamapim hevi... I kam long pes 1...

Wanpela sinia tisa i tok ol i no gat rait long rausim ol sumatin long painim nupela skul bikos ol papa na mama tu i tok olsem ol i les long ol narapela skul.

Em i tok i gat namel long 60 na 70 sumatin long wanpela klas na dispela i mekim ol tisa i painim hat long lainim bikipela namba olsem.

Em i tok dispela i kamapim tu hevi long ol i sot long ol ikwipmen na ol metiriel samting bilong yusim long lainim ol sumatin wantaim.

Maski ol i sot long ol samting, ol i kisim tasol ol sumatin i go insait, long skul long hia long wanem, dispela ol hevi em bilong ol papa mama long ol i ken tokim gavman we em bai luksave long ol fesiliti bilong ol skul bifo wokim kain polisi.

Em i tok i gutpela long gavman nau i luksave long ol hevi bilong sot long metiriel, sot long ol klasrum spes bipo long em i wokim ol polisi.

George lki long 5 Mail i tok pikinini boi bilong em i save skul long Erima Praimeri tasol em i go stretim nem bilong em aste, na no gat man long opis na olsem, em i laikim em long skul long Wardstrip.

“Ol i tok i gat planti sumatin long wanpela klasrum, tasol mi save olsem ol i save kisim gutpela skul na save,” Mista lki i tok.

Long wankain taim, planti toktok i kamap long dispela wik long ol skul i no ken sasim ol projek fi.

Projek fi i save helpim ol skul long baim ol skul operesen, ol projek, ol oksileri woklain, ol wara, telepon, pawa na ol arapela moa samting olsem.

Long dispela yia, Edukesen Minista, Nick Kuman i salim strongpela toktok olsem ol skul long kantri i no ken sasim ol projek fi.

Wanpela skul bod siaman long Madang provins i no amamas long disisen bilong gavman long rausim projek fi long dispela skul yia 2015.

Garry Komulong, bod Siaman bilong Erima praimer i skul long Astrolabe Be LLG long Raikos distrik long Madang i tokaut long tingting bilong em long NBC Radio Madang long stat bilong dispela wik bihain long em i harim ol ripot olsem Seketeri bilong Edukesen, Michael Tapo i tokaut olsem ol skul long kantri i no ken kisim ol projek fi long dispela yia 2015.

Mista Komulong i tok em i sapotim tiusen fi fri polisi bilong gavman, tasol i gat sampela ol eria we dispela mani bai i no inap karamapim olgeta wok o nid bilong skul. Olsem na ol skul i save sasim projek fi long kisim mani long sapotim ol long kirapim sampela ol projek long skul.

Em i tokaut olsem sampela ol eria we TFF subsidi we gavman i putim long ol skul i no save karamapim em ol samting olsem infrastraksa developmen.

Mista Komulong i tok long Erima praimer i skul, projek fi tasol i bin helpim ol long wokim nupela klasrum na tu haus tisa long ol yia i go pinis. Dispela i bin kamap bikos TSS subsidi bilong gavman i no bin go long skul long taim stret.

Toktok bilong dispela bod siaman bilong skul em i wokim long NBC radio Madang, bihain long toksave i bin go olsem olsem ol skul mas noken sasim projek fi long ol papamama long dispela yia 2015.

Em i tok olsem sapos gavman bai peim olgeta samting insait long TFF sab-sidi long dispela yia, ating moabeta ol edukesen projek opisa i mas go long wan wan skul na kisim ol projek plen bilong ol skul bilong wanpela yia o faivpela yia na givim long gavman na gavman i ken putim inap mani stret long helpim olgeta skul.

panismen we em i bin hangamapim wanpela trabel man long ai bilong pablik long dispela maket.

Bihainim dispela mekim save, maket i no stop na ol pipel bilong Sentral provins, Rigo, Abau, Marshall Lagoon, Wanigela, ol Motu-Koitabu kostal hauslain, Mekeo, Kairuku na ol arapela man na meri husat i save i stap klostu long bikipela siti Pot Mosbi i save pulim lain i go na salim na baim ol kaikai long dispela maket.

Na sampela yia bihain, maket i bin bungim planti hevi long ol kainkain pasin nogut na stat long smel, sting na bagarap.

Dispela i mekim na planti long dispela ol pipel bilong Sentrel provins i lusim Koki maket na i go nabaut.

Na taim maket i wok long bagarap i stap, i nogat wanpela lida i bin tingting long stretim i kam inap long las yia, lokol memba bilong Mosbi Saut na Spots Minista Justine Tkatchenko wantaim ol memba bilong Join Distrik Baset Praioriti Komiti (JDBPC), gavana bilong NCDC Powes Parkop na Praim Minista Peter O'Neill i kamap wantaim dispela tingting long developim maket.

Dispela tingting bilong developmen i kamap na karim kaikai. Opis bilong Mista Tkatchenko i painim na kisim et milien kina (K8milien) i kam long Distrik Sevis Impruvmen Program (DSIP) na em i kisim kaunta fanding i kam tu long Provinsal Sevis Impruvmen Program (PSIP) fans i kam long opis bilong gavana bilong NCDC Powes Parkop na wantaim helpim bilong ol developmen patna, Koki maket i kirap, develop na kamap

olsem wanpela namba wan eben maket we em bai i ken i go het long givim gutpela sevis i go bek long ol pipel bilong Pot Mosbi, Sentral provins na ol komyuniti insait long NCDC.

Mista Tkatchenko long opening seremoni bilong Koki maket long Tunde dispela wik i tok, olsem i lokol memba, Em i amamas long bringim dispela sevis i go long ol pipel bilong em long Mosbi Saut ilektoret.

Praim Minista Peter O'Neill husat i bin kamap long openim maket i tok, gavman bilong em i bin wanbel long tingting bilong Mista Tkatchenko na sapotim em long kirapim dispela maket.

Em i tok, Mista Tkatchenko i wok long mekim planti gutpela wok long kamapim ol developmen, bringim ol sevis na kamapim tu planti senis insait long Mosbi Saut ilektoret.

Mista O'Neill i tok em i amamas long luksave olsem fans long DSIP na PSIP we i kam long gavman bilong em i wok long kamapim planti senis insait long NCDC na ol arapela provins long Papua Niugini tu.

Em i tok, gavman bilong em i tok orait pinis na putim mani long mak bilong tu na hap milien kina (K2.5milien) long surukim Koki maket i go bikipela liklik long em i ken kamapim spesol seksen bilong salim ol buai insait yet long maket.

Long wankain taim tu Mista O'Neill i opim nupela TVet trening koles we i stap yet insait long maket.

Mista O'Neill na Mista Tkatchenko i mekim strongpela toktok i go long ol pipel long lukautim gut maket na trening



Yangpela meri bilong Sentral provins i gat planti spes nau long salim ol kaikai bilong ol.

sevis i go bek long ol pipel bilong Pot Mosbi, Sentral provins na ol komyuniti insait long NCDC.

Mista O'Neill i tok plen em i stap pinis long kamapim wankain seksen bilong salim ol buai tu long ol arapela maket insait long NCDC na Sentrel provins.

Emi tok amamas olsem narapela lokol maket long Sabama tu i op nau na Koki maket i bihainim wankain pasin.

Mista O'Neill i tok gavman bilong em i wok long sindaun nau na mekim plen we em bai putim ol mani long mak bilong 14 milien

kina (K14 milien) long meintenim, apgredim na bildim Gordons maket i go antap long narapela level.

Nau yet long wankain tingting em i wok long paitim toktok wantaim memba bilong Mosbi Not Wes Michael Malabag long developim na kirapim tu Lareva maket long Hohola.

Mista O'Neill i tok moa olsem sapos ol pipel i laik lukim planti senis i kamap, orait ol i mas senisim pasin, na long pasin senis tasol, bai gutpela senis i ken kamap.

Tupela wik tasol long rausim dai bodi long PMGH Mog

Sape Metta i raitim

MOG o bokis ais bilong putim bodi bilong ol daiman, long bikipela Pot Mosbi Jenerel Haus sik i pulap tru na opis bilong Sif Eksekutiv Opisa (CEO) bilong haus sik wantaim NCDC bai rausim ol bodi na bungim olgeta bodi wantaim na planim long wanpela hul long ples matmat long 9 mail long tupela

wik taim.

Ripot *Wantok Njus* i kisim long opis bilong CEO Grant Muddle i tok total namba bilong ol dai bodi em 76, we ol i no bin rausim long Septemba 2014 yia i go pinis i kam inap long mun Janueri 2015.

Long dispela 76 bodi, 37 long ol em ol man, 23 em ol meri na 16 em ol yangpela pikinini na nupela ol bebi em ol mama i karim long

en.

Mista Muddle i tok i no dispela tasol, insait long mog i gat ol ol bodi pats o haphap bilong ol bodi olsem ol lek tu em ol i stap.

Em i tok em i samting bilong sore sapos ol famili na wantok i no inap long kam, rausim ol bodi na ol bodi pats, long karim i go na planim ol long long matmat wantaim gutpela pasin.

Nau yet Mista Muddle i tok, haus sik wantaim NCDC i pasim tok pinis long rausim ol bodi wantaim ol haphap lek, bungim wantaim na karim i go planim long 9 mail matmat.

Ol i givim tu wiks long ol famili na wantok long ol i mas kamap na rausim ol bodi na bodi pats long mog bipo long dispela tu wiks taim bilong marimari i kamap.

MP Allen presenim 2014 akwital bilong Unggai/Bena

Sape Metta i raitim

MODEL distrik long Isten Hailans na Hailans Rigon – Unggai/Bena em i namba wan distrik long bringim ol fainensel akwitals bilong yia 2014 i go long Dipatmen bilong Implementesen na Rurel Developmen long Waigani long aste.

Lokol memba na Minista bilong Lens, Benny Allen wantaim Distrik Edministreta, Jonathan Resis na ol sinia edministresen wokman bilong distrik i bringim ol akwitel pepa wantaim ol lista bilong ol Distrik Sevis Impruvmen Program (DSIP) na lokol Level Gavman Sevis Impruvmen Program (LLGSIP) fans o mani we distrik i bin yusim long mekim ol wok projek long 2014, i kam long nesenel gavman.

Mista Allen i tok long taim bilong presentesen olsem em i amamas olsem dispela DSIP na LLGSIP



Lokol memba bilong Unggai/Bena long Isten Hailans Benny Allen (Ilephan) i presenim wanpela kopi bilong akwitel i go long Seketeri bilong DIRD Paul J Sai'i long palamen haus long aste (Trinde) na lukluk i stap em ol edministresen opisa bilong Unggai/Bena distrik.

Poto: Sape Metta

mani we nesenel gava-man aninit long lukaut bilong O'Neill-Dion i givim i kamapim planti gutpela samting insait long ol distrik long Papua Niugini, na Unggai/Bena distrik em i wanpela long ol.

Em i tok distrik bilong em i lukim planti senis long taim em i kamapim ol patnasip program wantaim ol sios we distrik i wok long helpim long kirapim ol haus lotu.

Na long wankain taim tu distrik kamapim gutpela wok bung pasin wantaim ol lokol pipel na helpim ol tu long bringim ol sevis olsem rurel hausing skim, rurel ilektrifikesen, ol rot projek, helt, edukesen na agrikalsa projek we iwok long i go strong tru long distrik.

Mista Allen i tok wanpela bikipela projek we i kamap long distrik em Unggai hai skul we bai kos moa long et na hap milien kina (K8.5milien). Dispela fanding bilong skul bai i kam yet long mani bilong DSIP.

Em i tok ol sumatin wantaim papa na mama bai lukim bikipela lait i kamap long distrik taim skul i kirap na operet long yia i kam bihain.

Seketeri bilong Rurel Developmen Opis Paul J Sai'i i tok em tu i amamas olsem Mista Allen em i wanpela memba husat i save mekim gutpela wok bung wantaim ol opisa bilong distrik long putim wantaim na stretim ol akwitel bilong Unggai/Bena na bringim i go long opis bilong em.

Em i tok dispela em i no namba wan taim long Mista Allen i stretim na presentim ol akwitels. Em i save mekim wankain pasin long ol yia i go pinis.

BSP Fainens bai helpim kastoma long aset fainens

BENK Saut Pasifik (BSP), i lonsim nupela fainens han bilong en long dispela wik long Pot Mosbi, bilong helpim ol kastoma long lukautim ol aset fainens bilong ol.

"Dispela nupela hap han em BSP Fainens (PNG) Ltd em bai givim nupela na gutpela moa sevis," BSP Sif Eksekutiv Opisa, Robin Fleming i tok.

Mista Fleming i tok olsem menesmen bilong Benk i gat strongplea tingting olsem ol kastoma bilong BSP Fainens bai lukim olsem BSP Fainens em i kam wantaim tingting i op long kamap gutpela patna long wokim bisnis. BSP fainens bai givim aut ol narapela prodak olsem tem diposit, fainens lis na komesol lon (dinau).

Em i tok tu olsem BSP Fainens wanpela i no inap long givim olgeta sevis bilong benk. Em bai wok wantaim BSP benk long ol sampela hap we BSP nau i no mekim.

"BSPF bai i gat sans long wok wantaim Aset Fainens tim bilong Benk we i stap nau, long wokim ristraksa, rifainens na wokim ol nupela we bilong kamapim gutpela kastoma aset fainens bisnis bilong ol bikipela transeksen," Mista Fleming i tok.

BSPF bai givim ol gutpela intres reit, bai hariap long apru-
vum ol transeksen na hariap long bekim askim bilong ol kas-
toma hariap. Dispela em ol sampela hap wok we BSPF i
lukim olsem nau BSP benk yet i no mekim gut.

BSP i go bikipela long maket bilong en nau olsem na em i
go aut tu long Saut Pasifik na tu long mekim gut ol wok bi-
long en insait long Papua Niugini. Em i laik bihainim nupela
kain klia tingting bilong wok long givim sevis long kastoma.

"Mi amamas tru long tok aut olsem ol isipela fainens polisi
bilong BSP bai givim narapela sans long ol kastoma husat i
no inap long bihainim olgeta gaidlain bilong ol komesel benk
o husat i laikim ansa hariap," Mista Fleming i tok.

BSPF bai strongim moa ol prodak na sevis bilong BSP
benk nau i stap, na tu em bai opim moa rot bilong givimaut
sevis long strongim kastoma bes na mekim maket sea i go
long Fiji, Papua Niugini na Solomon Islands.

BSP Bod Siaman, Kostas Constantinou, husat i stap
olsem BSPF Bod Siaman, i tok taim ol i lonsim BSPF, BSP i
wok long strongim em yet olsem wanpela bikipela bisnis in-
sait long benk na fainens indastri na wok bilong go insait long
ol arapela kantri long Saut Pasifik em i kam klostu nau.

"Kamap bilong BSPF em i gutpela long Grup i wokim. Dis-
pela kain bikipela wokabaut bai kamapim bikipela namba bi-
long ol kastoma long kisim gutpela sevis long BSP Grup,"
Mista Constantinou i tok.

Em i tok olsem BSPF em i kamap long wanem BSP Grup
i gat strongpela tingting long developim strongpela, potabel,
aset fainens kepesiti insait long BSP Grup, na ol BSP bod ov
direkta i stap baksait long dispela senis.

Hevi long bikipela mani mak BPNG i givim aut

Joylyne Karato UPNG sumatin i raitim

Wanpela risets bilong Nesenel Risets Institut (NRI) i painim
aut olsem bikipela hevi i stap namel long Benk bilong Papua
Niugini na ol Komesiel benk long taim ol i givim aut bikipela
mani.

Dispela hevi i kamap bikos diposit reit i go daun winim ol
mani ol i rausim long benk taim ol i lukluk long ol polisi reit
bilong BPNG.

Ol i painim aut olsem dispela polisi bilong BPNG i givim
liklik helpim na ino olsem ol narapela kantri.

Satish Chand, Profesa bilong New South Wales Yunivesiti
i painim aut olsem intres reit ol benk long PNG i sasim long
las 10-pela krismas long lon o dinau i moa yet winim ol intres
ol i peim long diposit.

Em i tok olsem i gat asua i stap long wokim bisnis we ol i
sasim bikipela intres reit na tu, i no gat planti benk i stap long
resis wantaim long mekim bisnis long PNG.

"PNG em i narakain liklik wantaim ol Is Esia kantri na Pasi-
fik. Indonesia em i wankain olsem PNG long ikonomi na di-
velopmen sait, tasol long wokim bisnis, PNG i no wankain
wantaim Indonesia." Mista Chand i tok.

Dokta Charles Yala i tok hevi em i stap wantaim gavman
long wokim bisnis we em inap long wokim sampela strong-
pela polisi long bisnis i ken ran long kantri.



Nupela BSP Fainens Tim.



bsp Finance
Grow your business

INTRODUCING BSP FINANCE (PNG) LTD

BSP, Papua New Guinea's leaders in innovative banking and financial solutions is proud to introduce to the market its newest subsidiary BSP Finance (PNG) Ltd. BSPF will offer a new and better alternative for customers asset finance needs.

About BSP Finance

BSP Finance are Asset Finance specialists. We finance Plant, Machinery, Equipment and Vehicles to IPA registered company's all over Papua New Guinea.

We are open minded business partners, that offer fast approvals and prompt settlements. BSP Finance has a team who's key focus is excellence in customer service and helping PNG business's grow.



MEET THE BSP FINANCE TEAM



JODI HERBERT
Country Manager



STEPHEN TAERA
Senior Lending Officer



ROBERT THADEUS
Senior Lending Officer
Lae



SHAUNA PAIKE
Lending Officer



LOPA ALUA
Lending Officer
Lae



IMELDA SAMBA
Lending Officer

Talk to us today  bspfinance@bsp.com.pg  320 1212 / 7030 1212 - 24/7

Spes pulap, Madang nidim moa haiskul – Sariki

James G. Kila i raitim

OL Palamen memba (MP) bi-long Madang Provins i mas givim moa luksave long edukesen na traim kamapim sampela moa haiskul long distrik bilong ol.

Dispela em bikos spes long ol praimer skul, haiskul na sek-enderi skul long Madang provins i pulap pinis na i gat bikipela nid long sampela moa haiskul i mas kamap long ol distrik long provins.

Madang Provinsal Edukesen Dairekta na Siaman bilong Provinsal Edukesen Bod (PEB), Moses Sariki i tokaut long dispela long Mande taim em i welkamim ol tisa na sumatin long 2015 skul yia.

Mista Sariki i mekim bikipela singaut i go long ol papamama na ol lida long distrik long askim ol Nesenel Memba bilong Pala-

men blong ol distrik long Madang provins long putim mani long kamapim sampela moa haiskul long provins.

Em i tokaut olsem long dispela yia 2015 i lukim spes i pulap tru long ol skul na dispela em wanpela bikipela hevi.

Olsem na em i tok askim ol lida long distrik nau i mas mekim em long askim ol MP bilong distrik long givim helpim long wokim kamap haiskul long distrik bilong ol.

Mista Sariki i tokaut tu olsem 9-pela praimer skul em PEB i luksave long ol pinis long ol i ken kisim gret 9 long dispela yia, tasol dispela bai kamap taim Gavana bilong Madang, Jim Kas i redim inap mani long sapotim dispela program long kamap.

Em i tok ol dispela skul em PEB i luksave long ol long kamap olsem ‘anex skul’ em Banara long Bogia distrik, Ambarina

long Madang distrik, Erima praimer long Raikos distrik, Sausi praimer long Usino-Bundi distrik, St Pauls praimer long Mirap long Sumgilbar na wanpela skul long Karkar ailan.

Em i tok long dispela yia em hevi bilong spes long ol skul long provins em i bikipela hevi tru.

Mista Sariki i toksave tu olsem bikos long hevi bilong no gat spes long planti ol skul insait long Madang provins, PEB nau i laik toksave olsem transfe bilong ol sumatin long narapela provins i go long Madang bai lukluk moa long ol sumatin we papamama bilong ol i muv i go long Madang long wok tasol.

Ol dispela sumatin we papamama bilong ol i transfe long go wok long Madang i mas i gat transfe pepa, na tu leta i kam long skul ol i stap pastaim na tu akademik mak.

Ol sios mekim bikipela wok long sapotim edukesen

IPBC Dairekta, Wasantha Kumarasiri, i tok em i gutpela long gavman na sios long wok bung wantaim na luksave long ol pikinini i no gat papa na mama long go long skul.

Em i tok olsem taim em i givim aut yunifom mani na skul fi olsem helpim long 5-pela pikinini long PNG Kea Famili Hom we ol i save lukautim ol kain pikinini husat i no gat lain i luksave long ol.

Em i tok tenkyu long Nesenel Dairekta, Collin Pake, long kamapim dispela Strongim Pikinini Edukesen Program long luksave na lukautimol kain pikinini na helpim ol long painim skul bilong ol.

“Mipela i save tok olsem PNG em i Kristen kantri na mipela i gat inap ol risos long kisim mani na helpim ol kain pikinini we sios i go pas long helpim long givim skul.

Na we ol i no save askim helpim long gavman tu.”Kumarasiri i tok.

Em i tok nau ol i lukim olsem dispela kain sapot na helpim bai kam tasol long ol ogenaísesen we ol sios sios i ranim.

Wan wan man i gat gutpela tingting long helpim ol kain pikinini save helpim ol sios long mekim kain wok we gavman inap long mekim.

Mista Kumarasiri i tok hevi i stap long helpim ol kain pikinini long wan

wan man na bisnis haus long helpim kain ogenaísesen olsem Laip PNG Care.

Mista Pake i tok ol dispela 5-pela pikinini husat i kisim helpim bai go long Waigani Praimeri na statim skul bilong ol gen.

Em i tok bikipela amamas na tok tenkyu bilong em i go long Mista Kumarasiri long kamap namba wan man long luksave long ol pikinini.

Em i tok i gat planti wok long mekim i stap na em i laikim helpim long wan wan man husat i gat gutpela tingting long helpim.

Trans-Gogol haiskul bai statim skul long Februeri 9

TRENS-Gogol haiskul long Madang provins bai statim skul yia bilong en wanpela wik bihain Mande, Janueri 9 bikos ples-kaikai bilong ol sumatin i kisim kaikai i no redi yet.

Na i no gat mani nau yet long bai kaikai bilong ol sumatin.

Peren na sitisen (P&C) siaman bilong Trans-Gogol haiskul, Benny Ullul i tokaut long dispela long Mande.

Em i mekim askim i go long Memba bilong Madang na Minista bilong Petrolim na Eneji, Nixon Duban na tu Gavana bilong Madang, Jim Kas long helpim dispela skul bikos skul ya i sevim ol sumatin bilong Madang na i laikim helpim.

Moa long en tu, skul i no gat inap mani long baim kaikai long lukautim ol sumatin husat bai go slip na skul long hap.

Tasol em i tokaut olsem rejestresen bilong ol sumatin i go het yet stat long Mande i kam.

Stat long Mande Febuari 2 i go

Fonde, Febuari 5 em skul i givim taim long ol sumatin long go rejista o givim nem bilong ol na tu kisim spes long skul.

Mista Ullul i tok olsem bod bilong skul i kamap wantaim disisen long muvim taim bilong skul i go neks wik Mande bihainim toktok bilong prinsipel bilong skul.

Em i tokaut olsem long Sande, Febuari 8 bai i gat P&C miting we prinsipel bai givim toktok bilong em.

Mista Ullul i tok olsem long dispela yia ol sumatin husat i go rejista bai sainim wanpela pepa long soim olsem ol bai bihainim stret lo bilong skul na noken bikheth.

Em i tok Trans-Gogol em liklik skul na ol i laik holim strong pasin bilong rispek na gutpela pasin i mas stap namel long ol sumatin na ol tisa.

Em i tok ol man sumatin i mas rispek long ol meri sumatin na tu stap gut wantaim ol tisa long skul wantaim famili bilong ol tisa.

Papa mama laikim olupela skul yunifom



Joylyne Karato UPNG
sumatin i raitim

PAPA na mama bilong ol sumatin bilong Wardstrip Demonstresen Praimeri skul i tok ol i no laikim nupela skul yunifom bilong skul long dispela yia.

Cathy Robin, mama bilong foapela pikinini i tokim wantok Niuspela olsem dispela nupela yunifom i no strongpela na bai i no nap stap longpela taim.

“Mi no save wok mani long baim yunifom gen taim em bruk hariap bikos mi lukim olsem kwaliti bilong yunifom em i no gutpela na mi tromoim moa mani gen long baim. Misis Robin i tok.

Em i tok olupela yunifom em i strongpela stret we ol liklik pikinini bilong em i save kisim yunifom bilong ol bikipela taim ol go long narapela skul na ol i no

save baim nupela gen.

Leah Sau wanpela mama long Gordens tu i tok olupela yunifom bilong ol Wardstrip em i gutpela moa long ol yunifom bilong ol narapela skul insat long Mosbi siti na save mekim ol pikinini bilong ol luk smat na narakain.

“Olpela yunifom i save stap tri-pela o 4-pela krismas bikos metiriel em i strongpela stret na kwaliti tu i gutpela.” Mama Leah i tok.

Wanpela sinia tisa husat i no laik givim nem i tok olsem ol i tokim kampani we i save wokim yunifom long kamapim gutpela kwaliti tasol ol i no kisim bekim yet.

Em i tok ol yunifom klos i no redi yet na ol i tokim ol papa na mama long peim mani i go long skul akaun na holim risit i stap, na bihain taim yunifom i kam, bai ol ken kisim.



Ol skul pikinini bilong Wardstrip Praimeri skul long NCD i redi long klinim skul eria bilong ol.

Poto: Joylyne Karato

Ramu NiCo luksave long Veronica - hatwok meri



Ramu NiCo CA Dipatmen opisa Veronica Bonamedura (lephan) i givim donesin long wanpela spots kompetisen long Usino las yia.

JAMES G. KILA i raitim

RAMU NiCo Menesmen (MCC) Limited long las wik i givim luksave long sampela ol wokman meri bilong en long gutpela wok ol i wokim long yia 2014.

Presiden bilong Ramu NiCo, Mista Wang Jicheng i tokaut long dispela insait long 2015 Enuel Wok Konprens bilong Kampani long Mande, Januери 26 we ol senia menesmen tim long Beijing, Madang, KBK Main na Basamuk Rifaineri i sindaun harim long video konprens.

Namel long ol lain i kisim luksave na awot em wanpela mama na strongpela wokmeri bilong Komyuniti Afeas Dipatmen bilong Ramu NiCo (MCC), Veronica Bonamedura.

Ol wanwok bilong em i save kolim em Vero, na em i save wok long CA dipatmen edmin lojistiks na prokiumen seksen, na em i save wokim gutpela wok long helpim ol klaien na ol fil opisa bilong CA Dipatmen long Kurumbukari Main na Basamuk Rifaineri long Madang provins.

Vero i tokaut olsem wok bilong em long lojistiks seksen i gat ol salens tu i stap. Sampela taim em i save wok long stretim wari bilong ol papagraun long Ramu Projek Impek eria. Wantaim dispela em i save mekim wok bilong stretim wok na wokabaut bilong ol CA fil opisa long wok bilong ol i ken go gut.

Vero i luksave long ol helpim ol wanwok bilong em i givim long CA Dipatmen olsem ol senia opisa long mekim wok bilong em i go

orait na bihainim nid bilong dipatmen.

Em i tok olsem dispela setifiket em i kisim olsem 'Aut-standing Employi bilong 2014' bai pusim em long wok strong na abrusim ol salens na em i bilip olsem em bai go antap long narapela level sapos i gat sans long wok i kamap insait long CA Dipatmen bilong Ramu NiCo.

Vero yet em hapkas Is Sepik provins na Chimbu, na em i marit long Chimbu provins. Em i bin stat wok wantaim Ramu NiCo Menesmen (MCC) long Madang Bes opis bilong CA Dipatmen long Me 2, 2011. Pastaim long em i wok wantaim MCC, Vero na man bilong em i bin stap long Alotau, Milen Be provins we Vero i bin wok wantaim Milen Be Estet olsem ovasis peimen opisa. Pastaim long dispela em i bin wok 6-pela yia wantaim Westpac Benk long Lae na Wewak.

Planti ol bikipela wok bilong Projek i no inap kamap sapos ol wokman bilong Ramu NiCo i no sanap strong long muvim projek aninit long ol bikipela salens i kam.

Olsem na long dispela as Ramu NiCo wantaim MCC Grup i givim luksave na givim awot long sampela ol lain wokman

Ramu NiCo Menesmen (MCC) tu i bin luksave na givim awot long ol lain wokman bilong en husat i wokim gutpela wok na soim hatwok bilong ol long ol arapela Ramu NiCo wokman.

Kampani i luksave na givim awot long gutpela wok bilong ol.

Papua Niugini winim sik Leprosi

SIK Leprosi i bin wanpela bikipela sik no gut i bagarapim planti pipel pastaim long kantri i kisim independens.

Insait long planti hap long kantri, bipo koloniel gavman i bin kirapim ol bikipela haus sik olsem ples we ol i rausim olgeta lain husat i gat mak bilong sik leprosy long ol ples bilong ol na i putim ol long dispela ol haus sik long ol bai kisim marasin inap long ol i kisim orait o no gat ol i dai.

Tasol bihain long indipendens, sampela gutpela kain marasin na wok lukaut i kamap wantaim gavman na helt dipatmen we i lukim dispela sik i wok long go daun bikipela tru na ol i pasim ol dispela kain ol haus sik o ples bilong holim ol sik leprosi lain.

Nau Papua Niugini helt ministri na helt dipatmen i tokaut olsem kantri i kisim pinis mak bilong tok olsem sik leprosi em i pinis olgeta long kantri dispela i bin kamap long yia 2000 yet.

Sereteri bilong Helt, Pascoe Kase i tokaut long dispela gutpela nius pastaim long kantri i tingim Wol Leprosi De long Sande i go pinis.

Mista Kase i tok, Papua Niugini i wanpela bilong ol 35 kantri long Westen Pasifik rijon lon gkisim dispela mak bilong Wol Helt Oge-naisesen (WHO), em 0.7 pipel bilong 10,000 populesen i kisim sik leprosi long yia 2000. I gat 37 kantri long Westen Pasifik rijon.

"Planti sik mipela i laik

rausim long kantri na mipelai gat gutpela stori long pinisim leprosy na polio long Papua Niugini na yumi olgeta i mas amamas long dispela," Mista Kase i tok.

Long 1991 Nesenel Leprosi Eliminisen program i bin kirap na long dispela taim i kam, kantri i lukim bikipela senis i kamap. Namba bilong ol nupela lain i kisim sik leprosy i go daun lusim mak bilong 14 siklain insait long 10,000 pipel i go long wanpela tasol namel long olgeta 10,000 pipel long yia 2000.

"Taim program i bin stat, mipela i bin gat 3,799 siklain i stap long rejista.

Ol dispela siklain i kisim orait pinis na mipela bringim namba bilong ol lain i kisim sik i go daun long gutpela

mak," Mista Kase i tok.

Long 2000 i kam inap nau, Papua Niugini i wok long stap yet long mak bilong wanpela sikman namel long 10,000 pipel wantaim 100 pesen stendet Malti drag terapi (MDT) insait long kantri.

Long yia 1930 taim bilong koloniel gavman i bosim Papua Niugini, ol siklain i save kisim wanpela marasin tasol na ol i stap longwe tru long olgeta narapela lain. Tasol nau bikipela senis tru i kamap.

Mista Kase i tok olsem, long pinis bilong yia 2013, PNG i gat 650 long rejista wantaim mak bilong 0.8 long wan wan 10,000 pipel na nupela lain lain kisim sik em i go long mak bilong 5.1 insait long 100,000 mak bilong nesenel populesen.

Ol Bogenvil sumatin nes rejista long UPNG

Frieda Sila Kana i raitim

BUKA haus sik nau i kisim narapela level i go antap long kamap Jeneral Haus sik, na long mekim wok olsem Jeneral haus sik, em i mas gat ol dokta na nes na ol helt woka husat i gat ol digri na pepa inap long wok long kain mak bilong helt stendet olsem.

Long dispela as tasol, Buka Jeneral Haus sik i wok long salim ol wokman meri bilong en i go long yunivesiti long kisim moa save long wok long dispela kain mak.

Dulcie Masoai wanpela rejister nes opisa long Buka Jeneral Haus sik wantaim Edin Banak em tupela ol nes we i kam long Pot Mosbi long Medikol Fekalti na rejista long kisim kos bilong Ekiut Kea, Peri Operativ Tieta Nes.

Tieta long Buka Jeneral Haus sik i gat wanpela speselis nes tasol olsem na ol i salim tupela moa nes i go long UPNG Medikol Fekalti long kisim skul bilong wok insai tlong operesen tieta.

Dispela kos em i wanpela yia kos na Buka Jeneral Haus sik yet i sponsa long tupela long kam kisim dispela speselis trening. Tupela i rejista hariap olsem na ol i kisim rum long 'G' blok bilong ol haus slip bilong ol sumatin.

Tupela i bin kamap long Tunde tasol blekaut long pawa i mekim na ol Admin i no bin inap long wok na tupela i rejista tasol long Trinde. Wantaim rejista nau



L- Edin Banak, Dulcie Masoai, Sylvester Kerehana sanap ausait long Medikol Fekalti Edmin blok long Taurama Kempas. Poto: Frieda Sila Kana

tupela i gat kat bilong kisim kaikai. Dispela kos bai pinis long Desemba 2015.

Narapela sumatin helt wok bilong Buka Jeneral Haus Sik em, Sylvester Kerehana. Mista Kerehana bai wokim Diploma long Anastetik Saiens em i 1 yia kos. Krehana em i kam long self spons na em i baim pinis K2,000 bilong K12,000 tuisen bilong em long rejista.

Tasol em i wet long Rijonal memba bilong Bogenvil Joseph Lera long baim narapela K10,000 na bai em i kisim pul rejista. Nau yet

Kerehana i wok long slip ausait wantaim ol wantok tasol taim em i baim pul fi nau bai em i ken kisim wanpela rum insait long yunivesiti.

"Mista Lera i putim K700,000 baset long helpim ol Bogenvil sumatin long ol haia institusen. Helpim bilong em i no gat mak bilong en. Em i tok long baim tasol wanem mani mak ol sumatin i askim long en." Mista Kerehana i tok.

Buka Jeneral Haus sik nau i kisim mak i go antap olsem bikos em i gat 4-pela konsalten dokta, wanpela

dokta bilong yau, nus na nek (ENT), wanpela gaenokolojis dokta bilong ol meri na tupela sejen dokta bilong katim ol lain i gat bikipela sik long bodi. Ol i gat tupela rejistra dokta tu olsem nan au ol siklain we pastaim i save go long Rabaul, Lae na Pot Mosbi i no moa bai go aut. Ol bai stap yet long Buka na kisim helpim long hap.

Nau em i isi tru long go kam long haus sik bikos em i stap tasol long Buka taun. Bihain bai AROB i kirapim gen Arawa haus sik.

CBC egensim polis i kilim dai na bagarapim man

...Stretim pe, haus na trening bilong polis

TAIM Konprens bilong ol Katolik Bisop bilong PNG na Solomon Ailan (CBC) i egensim pasin ol polis i mekim long yusim krangi pawa bilong ol na kilim dai na bagarapim ol man, em i singaut long ol atoriti long givim gutpela trening na gutpela haus bilong ol na ol famili i stap long en, na mekim gut wok.

Jenerel Seketeri bilong CBC, Pater Victor Roche SVD, i tok CBC i wari long ol pasin we polis i mekim insait long tupela wik i go pinis na i toktok long traim kamapim sampela gutpela samting long helpim tu ol polis i lusim ol dispela pasin.

Kilim tupela man long Hanuabada ausait long Mosbi siti, wanpela meri long Lae na wokim pasin no gut long Boroko Polis sel em tripela long ol samting ol polis i bin kamapim insait long tupela wik i go pinis.

"CBC i egensim tru bagarapim na kilim ol man ol polis i mekim. Polis i mas mekim na soim gutpela pasin, na luksave long ol rait bilong ol man," Pater Victor i tok.

Em i tok CBC i luksave olsem pasin bilong bagarapim ol man we polis i mekim em bikos i no gat gutpela lidasip, i gat korap pasin long polis fos na tu, i no gat gut-

pela trening na haus slip.

CBC i laikim bai gat gutpela wok painim long ol kilim dai na bagarapim ol man polis i bin mekim.

Em i laikim ol atoriti i rivyuwim o glasim pen a haus bilong ol polis, givim ol gutpela na longpela trening na ol bai lainim gut ol samting, givim in sevis trening long ol polis manmeri i wok longpela taim, na kisim moa polis bilong Australia long givim edvais na skul long ol polis bilong yumi.

Manus Ailan ditensen senta we Australia i putim ol asailam sika i narapela wari eria CBC i gat long en.

Bikpela nius i bin kamap we moa long 1,000 asailam sika i bin holim wanpela straik na i no kaikai long 13-pela de bikos ol i no laik stap long Manus, tasol ol i laik go long Australia.

Straik i bin pinis long Januəri 26 bihain planti moa sekyuriti lain i go long senta na stopim dispela trabel bipo em i go no gut.

As stret bilong straikem ol asailam sika i no amamas long plen bilong PNG gavman long sindaunim ol trupela refuji long nupela kem long Manus.

CBC nau i askim gavman bilong PNG na Australia long

glasim ol asailam sika long Manus ditensen senta na givim ful refuji stetus na tu, mekim senta i gutpela ples bilong ol long stap long en.

Tu, CBC i askim tupela gavman long no ken fosim ol asailam sika

i go bek long ol asples kantri bilong ol bikos dispela i no seif na tu, wokim wanpela risetelmen polis bilong ol refuji long PNG na pablik long dispela kantri bai save na i klia gut long en.



Pater Victor Roche SVD, Jenerel Seketeri bilong Konprens bilong ol Katolik Bisop i toktok long nius bung wantaim ol niuslain long dispela wik Mande.



Piksa i soim ol man we polis i paitim olsem piksa long "police brutality" o paitim no gut ol man polis i mekim long PNG. Foto: ABC

Woksop bilong ol Katolik midia long Kokopo

KOKOPO long Is Nu Briten Provins bai lukautim wanpela wik woksop bilong ol Katolik midia long mun Epril.

Komisin long Sosel Komyunikesen bilong Katolik Bisops Konprens bilong PNG na Solomon Ailan (SOCOM) wantaim Senta bilong Risets na Edukesen long Komyunikesen (CREC) long Lyons, Frans i bung wantaim na ranim dispela woksop bilong ol PNG na Solomon Ailan Katolik Redio woklain. Woksop bai stat long Sande Epril 12 na pinis long Fraide, Epril 17.

Pater Giorgio Licini, em kodineta bilong woksop i tok 15-pela pipel bai stap insait long dispela woksop na olsem, i salim ol nem hariap i go long dispela etres, Sister Daisy Lisania long Kokopo: dalisaniams@yahoo.com.au na Pater Giorgio Licini-giorgiolicini@yahoo.com na Pater Victor Roche SVD long 3259577.

Ol lain i sponsaim ol woklain bai salim K200 fi i go long ANZ Benk, Madang-CBC SOCOM-0014438507.

Pater Giorgio i tok bai gat ol trening long ol nupela lain bihain.

Ol i askim ol lain bai go long woksop long kisim ol kompyuta na rekoding masin bilong ol wantaim.

Tupela lain bai go pas long woksop em Sean Patrick Lovett em Dairekta bilong Itali na Inglis program long Vatiken Redio long Rom na Pater Fabrizio Colombo MCCJ em Dairekta bilong SIGNIS opis long Rom. Tupela bikman i gat bikpela save na ekspiriens long redio prodaksen na brotkasting. CREC bai baim balus tiket bilong tupela bikman long kam long PNG na go bek. Pater Giorgio i autim tok tenkyu i go long MISSIO Aachen na CREC long sponsaim dispela woksop long midia fomesen.

Wankain tu long Rabaul Asdaiosis na Asbisop Francesco Panfil SDB na ol woklain bilong em long hostim dispela woksop.

Nupela projek long lukautim gut ol Michelangelo penting

VATIKEN siti, em hetkota bilong Katolik Sios long wol i gat planti ol gutpela penting na droing (painting na arts) bilong ol biknem atis long itali na wol we i pulim planti turis moa insait long las 20 krismas.

Ol penting na droing i save stap long Sistene Sapel.

Klostu long pinis bilong las yia, Vatiken i bin opim projek long wokim nupela na gutpela lait na ekondisen sistem long Sistene Sapel bai helpim long lukautim ol biknem penting bilong biknem atis long wol i dai klostu 500 handet krismas i go pinis, em long Michelangelo Buonarroti.

Ripot i kam long Zenit Nius i tok projek bai kostim 3 milien dola bilong Yuro.

Ripot i tok dispela projek bai kontrolim ran bilong ekon na tempretja o hot na kol level insait long sapel.

Nupela teknoloji ol bai putim bai gat 70 sensa o masin we ol bai putim i go long ol wol bilong sapel na tupela klos seket TV kemra bai kisim rekot long ol visita na pipel i go lukim ol penting na droing long Sistene Sapel.

Dairekta bilong ol Vatiken Musium, Antonio Paolucci i tok sapos mak bilong ol visita long Sistene Sapel i go antap, bai ol i putim mak long 20,000 pipel visita long wanpela de. Na ol bai larim tasol 2,000 pipel long wan wan taim.

Em i tok 6 milien visita i save go lukim ol penting insait long Sistene Sapel long wanpela yia.

20 krismas i go pinis, mak i save stap long 1.5 milien visita long wanpela yia.

Em i tok planti visita tumas i wok long kamapim hevi olsem polusen na bagarap long ol atwok bilong sapel.

Dispela projek i bilong makim 450 krismas bihain long dai bilong Michelangelo.

Mista Paolucci i tok dispela projek i gutpela moa bikos em bai lukim olsem ol biknem penting bilong Michelangelo i stap gut na tu, laiting sistem i gutpela long ol visita na pipel i go insait long lukim ol penting.

Ol penting tu bilong ol narapela atis bilong Itali olsem Botticelli, Chirlandaio na Perugino i stap long ol sait sait bilong sapel.

Moa populesen bilong ol lapun long Yurop

MAK long populesen bilong Yurop i stap daunbilo winim ol arapela kantri long wol bikos ol dispela kantri i save gat ol liklik famili.

Tu, bikpela populesen i go lapun na ol dispela i pinis long wok.

MAK long krismas bilong ol woklain long Yurop bai go daun long ol yia i kami nap long 2060, bikos planti pipel i ritaia na ol yangpela woklain i go insait, Zenit Nius i ripotim.

Ripot i tok dispela bai kamapim hevi long gro bilong ikonimi o wok mani long

Yuropien Yunien (EU).

Ripot i tok moa olsem sapos mak long ol nupela bebi i no bikpela, ret o mak bilong ikonimik gro long ol EU kantri bai go daun moa yet.

Ripot i tok maski sapos planti lain bilong ol narapela kantri i go sindaun long ol EU kantri, mak bai go daun yet.

Ripot i tok wol populesen na mak bilong populesen i go lapun na ol dispela i pinis long wok tu long ol kantri olsem Japan, Saina na Amerika i wok long go long wankain rot olsem long Yurop. Tasol long Afrika, em i narakain long

Yurop.

2015 "Aging" ripot i tok bai Yurop i lukim senis tu bikos long moa yangpela bai karim pikinini, manmeri bai stap longpela taim moa na moa pipel long ol narapela kantri bai go long Yurop.

Tasol nau, Yurop i gat moa lapun lain populesen.

Ripot i tok Itali, Yunaitet Kingdom, Germani na Spain bai kisim planti ol lain bilong ol ausait o narapela kantri na dispela bai apim mak long populesen bilong ol.

WANTOK

KOMENTRI

Gutpela na nogut hanmak bilong fri edukesen



Skul i stat gen long dispela wik na ol papamama i amamas bikos ol i no baim skul fi. Bikpela tok lukaut i kam long Dipatmen bilong Edukesen olsem ol papamama i no ken baim projek fi. Sapos wanpela skul i sasim projek fi bai dipatmen i no inap long givim skul subsidi mani bilong 2015. Na dipatmen i tokim ol papamama long kotim wanem skul i sasim projek fi. Projek fi i save stap long mak bilong K200 i go inap long K500.

Fri edukesen i gat i gutpela na nogut bilong en tu. Sapos i no gat projek fi, bai ol skul i kisim mani we long givim gutpela kwaliti edukesen i go long ol pikinini? Edukesen dipatmen i no save givimaut mani hariap long taim skul i stat. Ol skul i save wet longpela taim bipo long ol i kisim dispela helpim mani i kam long Dipatmen bilong Edukesen. Ol skul i save sot tru long planti samting bikos i no gat mani bilong projek fi long baim ol samting skul i sot long en.

Long planti skul long Mosbi long dispela wik, i gat hevi i stopim skul long stat gut. Sampela skul i no gat wara, sampela i no gat pawa bikos i no gat mani bilong baim ol dispela samting. Sampela skul i no gat ol buk na arapela samting bilong klasrum. Skul opis i sot long pepa saplai olsem na ol i no inap printim ol tok save bilong ol papamama.

I tru olsem ol tisa i stat wok wan wik bipo skul i stat, tasol i no gat mani bilong baim ol samting na redi gut long taim ol pikinini i go bek long skul long dispela wik. Sapos gavman i no laik ol skul i sasim projek fi, orait Dipatmen bi-

long Edukesen i mas hariap long skelim mani i go long ol skul nau bai ol inap long redi gut long statim nupela skul yia.

Olgeta skul long kantri i no wankain. Yumi gat ol komyuniti skul, na haikul we ol pikinini i stap long haus na go skul. Na i gat sampela haikul na sekenderi skul we ol studen i save slip long skul. Bikpela mani i save lus long lukautim ol studen na haus slip bilong ol na baim kaikai bilong ol. Ol skul i nidim mani long baim petrol bilong skul bas o trak. Na i gat planti arapela samting tu i kostim bikpela mani tru long wan wan yia. Olsem na sapos i no gat projek fi, bai sampela skul i painim bikpela hevi.

Hia long PNG, pasin bilong lukautim ol skul na sapotim ol projek bilong skul i no strong tumas. Ol papamama i no smat long makim gutpela skul bot o soim pes long taim bilong skul miting o helpim het tisa long strongim wok bilong skul.

Yumi save lusim wok bilong ranim skul long han bilong het tisa na skul bot tasol. Dispela kain les pasin bilong ol papamama i save kamapim hevi we i no gat gutpela senis i kamap long skul bikos no gat man i sekap long wok bilong skul bot o het tisa.

Fri edukesen i mekim planti papamama i no tingting moa long givim han long ol liklik projek insait

long skul. Ol kain samting we i ken apim kwaliti bilong edukesen na mekim ol pikinini na tisa i amamas long stap long skul. Ol kain liklik samting olsem gutpela ples long sindaun long belo na kaikai, o simenim rot bilong wokabaut namel long ol klasrum. Dispela em ol liklik samting tasol bai i mekim skul i kamap ples bilong amamas na ol pikinini i ken skul gut.

Fri edukesen i mekim ol skul i painim spes bilong putim ol pikinini. Ol klasrum i pulap tumas na tisa i no inap skulim ol pikinini.

Long planti elementeri skul ol pikinini i sindaun long graun bikos i no gat spes bilong putim ol des.

I gat planti arapela hevi i kamap

na bagarapim skul bilong ol pikinini.

Hanmak bilong fri edukesen i mekim ol papamama i les long givim han long helpim skul. Na nau i no gat projek fi, bai planti skul long kantri i painim taim bikos ol papamama i no inap strongim skul we ol pikinini bilong ol i go long en.

I no gat wanpela samting i fri long dispela graun. Sapos yu laik wanpela samting bai yu mas baim o givim senis bilong en. Wankain tu long edukesen.

Sapos yumi laik ol pikinini i kisim gutpela kwaliti edukesen, orait yumi mas kamautim mani long poket na baim. Mekim olsem bai ol pikinini tu i luksave olsem ol i mas hatwok long painim gutpela sindaun long bihain taim.

Morobe givim 2015 Morobe Baset i go long Treseri

Paul Maima i raitim

MOROBE Provinsel Gavman i bin givim 2015 Baset o mani plen i go long Minista bilong Treseri long las wik.

Dispela baset i gat mani mak bilong K480.7 milien we Tutumang i pasim long las mun na ol memba bilong Tutumang wantaim Provinsel Administresen i go na givim long Minista bilong Treseri Patrick Pruiatch.

Taim ol i givim dispela baset, Provinsel Minista bilong Polisi na Plening Patrick Basa i tok dispela baset em olgeta memba bilong Tutumang i tok orait long en na pasim long Janueri 15.

Basa i bin kisim sapot bilong ol narapela wanwok bilong Tutumang olsem Minista bilong Sios na Gavman Bisenis Charlie Foike na Meya bilong Lae City, Truiley Koim na Provinsel Administreta Gioving Bilong, tupela namba tu bilong em, Shila Hao na Masayang Moat.

Basa i tok dispela baset em i wanpela bikpela baset bilong ol we i kamapim ol-



Long hankais, Morobe Provinsel Administreta, Gioving Bilong, Provinsel Sios Minista, Charlie Foike, Lae Siti Lod Meya, Truiley Koim, Tresera, Minista Patrick Pruiatch, Provinsel Tresera, Patrick Basa, Basetopisa Mis, Lyndana Deputi Administreta, Shila Hao. Foto: Paul Maima

geta wok projek bilong ol insait long provins.

Em i tok tu olsem pe bilong ol wokman meri insait long provins bai kisim olsem K178.7milien, Administresen yusim K47.3milien, basic servis delivery K33.9 milien na K10.2milien bilong 33 pela LLG insait long Morobe.

Developmen Baset bai kisim K210.6milien long kamapim Morobe provins.

Basa i tok tu olsem igat bikpela wok ristraksa bilong Provinsel gavman olsem na

ol i kisim bikpela mani tu insait long dispela baset. Na dispela bai lukim olsem 37 pesen bilong dispela baset em igo long dispela wok.

Em i tok tu olsem dispela developmen baset bai lukim tu mekim strong ol wok we Nesinol Gavman i tingting long kamapim insait long edukesen, helt, lo na oda, Infratraksa

Basa i kisim maus bilong Gavana, Kasiga Kelly Naru, na tok tenkyu long Nesenel Gavman long planti ol

bikpela projek i kamap insait long Lae Siti na Morobe provins. Ol kain wok olsem Lae siti rot, Laena Nadzab rot, skruim men wof, stretim gen Angau Haus sik na narapela ol wok we i kamap insait long provins.

Minista Pruiatch i tok amamas long lukim wanpela gutpela baset bilong Morobe na promis olsem em bai givim ol lain bilong em long Baset long lukluk hariap na oraitim baset long Morobe mas mekim wok bilong ol.

WANTOK

Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspapa.com

Pe bilong wanpela via. 52 niuspapa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service	
6am - 7am	6080; 7240(KHZ)
7pm - 9pm	5995; 6020; 9710; 1280(KHZ)



Ol diwai ol i katim long Papua New Guinea. Poto: ABC

PNG i mas stop long salim ol raunpela log

Papua New Guinea Gavman i mas stopim nau wok bilong salim ol raunpela log i go long ol narapela kantri, faunda bilong Greens Pati na Envairomen ektivis, Dorothy Tekwie i tok.

I gat askim i go long Papua New Guinea gavman long stopim nau wok bilong salim ol round logs i go long ol narapla kantri.

Mis Tekwie i sutim tok long ol Palaman memba long slip na larim ol ausait kampani long katim na stilim ol diwai na kisim bikipela mani long ol.

Em i tok em i autim dispela wari long wanem, planti foren kampani em planti long ol i kam long Asia i wok long katim ol bikbus long ples bilong en long Sandaun Provins, na mekim bikipela mani taim ol i salim ol dispela diwai i go long ol narapela kantri.

Wok bilong loging i wok long kamapim ol bikipela wari long ol papa graun long plantri hap bilong PNG.

Nau Mis Tekwie i askim ol tim bilong ol narapela kantri long mekim wok painimaut long ol wok loging long kantri.

Solomon Ailand yut

bai gat nupela megesin

LONG Solomon Ailan ol lain bilong Youth@Work i redi nau long statim nupela buk o megesin bilong ol yangpela yet, Sandra Bartlett husat i go pas long Youth@Work long Solomon Ailan i tok.

Dispela em i nupela projek bilong ol na as tingting long statim em bilong tokaut long ol stori na wari ol yangpla pipel bilong Solomon Ailan i save bungim long laip bilong ol.

Sampela long ol narapela progreman bilong ol em long Yut maket, narapela em Poto Vois we ol yangpela i save kisim ol poto na mekim ol stori long ol.

Mis Bartlett husat i go pas long Youth@Work i tok sampela long ol samting em bai ol i save putim long dispela megesin em ol stori olsem ol yangpela i no save gat wok, wari long helt bilong ol, skul na planti ol narapela samting.

Em i tok tu olsem sampela long ol stori bai lukluk tu long ol gutpela stori.

Vanuatu i tok tenk yu long ol Australia

Anita Samana Rurel Komyuniti Projek Kodineta bilong Youth Challenge i tok tenkyu long Voice Australia long salim ol yangpela

pipel long helpim ol yangpela pipel bilong Vanuatu long pinisim sampla projek long tripela hap long kantri.

Long mun i go pinis, sampla yangpela pipel bilong Australia i bin joinim ol yangpela Ni-Vanuatu husat i memba bilong Youth Challenge Vanuatu i bin wok long tripela projek long Santo, Epi na Tanna.

Ol i bin bildim rurel klinik long Santo, stretim gut wanpela kakau shed oa ples bilong putim kakao long en long Epi na tu, ol i bin bildim klasrum long wanpela skul long Tanna.

Youth Challenge Vanuatu na Voice Australia i gat wokbung wantaim em ol i bin statim sampela yia i go pinis.

PNG Midia helpim kamapim gutpela sindaun

WOK bilong midia em i wanpla bikipela samting we i ken helpim long kamapim ol gutpela senis long Papua New Guinea, Benedict Oli bilong TopShot media long PNG i tok.

Mista Oli i wanpela yangpela niusman bilong PNG husat i pinisim wanpela trening long mekim ol dokumentri stori long Yunivesiti bilong Melbourne long dispela wik.

Benedict Oli, husat i wok wan-

taim TOPSHOT media limited long PNG i bin kam skul long lainim ol nupela rot bilong mekim ol stori long sidaun bilong ol pipel long ples, na tu ol senis i wok long kamap long ples.

Mista Oli i tok tu olsem wanpela gutpela samting em ol nius manmeri bilong PNG yet i ken mekim em long tokaut long ol stori we ol yet i save gut long en. Na i no bihainim tingting bilong ol nius manmeri bilong ol narapela kantri.

Em i tok, planti taim ol nius manmeri bilong ol narapela kantri i save raitim ol nius em i save bagarapim nem bilong PNG olgeta taim.

Ol Hanuabada pipel i rausim rot blok

OL pipel bilong Hanuabada vilis long Pot Mosbi i rausim pinis ol rot blok em ol i bin putim long wik i go pinis bihainim dai bilong tupela man bilong ples.

Ol i bin putim dispela rot blok bihain long ol polis i bin yusim gun na sut nating i go long wanpela grup biong ol pipel bihainim kros namel long ol pipel em ol i bin wok long salim buai na ol kaunsil opisa.

Dai blong ispela tupela man i bin mekim ol pipel bilong Hanuabada long pasim bikipela haiwe namel long Mosbi siti na bikipela LNG Plant long wes bilong siti.

Dispela rot blok i bin stopim tu wok bilong bringim fuel na ol narapela wok bisnis long Port Moresbi.

Dadi Toka Junia emi wanpela komyuniti lida long Hanuabada vilis na kandere bilong wanple long ol dispela man em i bin dai, Toka Gaudi.

Praim Minista, Peter O'Neill, i tok bai ol i statim wanpela wok painimaut long dispela dai bilong tupela man ya. Toktok bilong en i kamap bihainim wokabaut bilong en i kam long Australia long despela wik we em i bin askim Praim Minista bilong Australia, Tony Abbott, long larim planti moa Australian Federal polis opisa long wok long PNG.

Long dispela taim, i gat sampela Federal polis opisa bilong Australia i stap pinis long PNG, tasol Praim Minista O'Neill i tok em i laikim

planti moa opisa i go long PNG.

Na Metropolitan Polis Superintenden bilong Nesenel Kapitel Distrik, Andy Bawa i tok em i wanbel wantaim dispela tingting bilong Praim Minista O'Neill.

PNG Niusman kisim UN Awot

WANPELA niusman bilong PNG i raun long Australia aninit long luk-save bilong UNDP long raitim nius egensim korapsen long PNG.

Elias Nanau ibin winim Media Award blong UNDP long 2013 long wanpela ripot blongen long soim aut korapsen long PNG.

Em i stap nau long Canberra long toktok wantaim ol man save long sait long korapsen na pasin bilong gutpela gavman long PNG na olgeta hap bilong Pasifik.

Dispela wokabaut bilong Elias long wanpela wik i hap bilong dispela UNDP awot bilong en.

PNG Midia helpim pipel wantaim ol nupela teknoloji

WANPELA midia lain bilong Papua New Guinea i wok long mekim ol stori bilong helpim ol pipel long kantri long save gut long ol rait bilong ol.

Dispela lain i bilong TOPSHOT Media kampani na wanpela liklik lain bilong PNG yet i bin statim sampela taim i go pinis.

Sampela long ol wok em ol i mekim pinis i karamapim ol projek o wok i lukluk long ol wanem samting i save kamap long laip bilong ol pipel, na sapos ol displa samting i gutpela o no gat.

Planti taim tu, ol i save mekim ol stori long ol bikipela samting i kamap long kantri olsem sapos ol lida bilong ol narapla kantri i raun long PNG, o ol pasin tumbuna.

Wanpela samting em ol i bin mekim stori long en long yia i go pinis em Jenda Ikwali o rot we ol meri i ken mekim ol wok wankain olsem ol man.

Benedict Oli, em i wanpela long ol man husat i bin kirapim displa kampani na nau em i bin go bek long PNG bihainim tupela wik skul long mekim ol stori long piksa o vidio.

WOLNIUS

MUSIUM long Cairo, Ijip, i tok sampela lain i bin bagarapim na glium bek wanpela long ol bikipela tresa o bikipela samting long histori kantri i gat luksave long en em mask bilong manki King Tutankhamun.

Tasol museum i tok ol i ken stretim dispela tresa we krismas bilong em i winim 3,000 yia.

Long wanpela asua long las yia Ogas, museum i bin rausim mausgras ol i wokim long gol, tasol em i no bin tokaut long dispela i go long pablik inap ol poto i bin kamap long Intanet.

Bihainim dispela, pablik i bin autim ol toktok na wari long dispela biknem atifek bilong kantri Ijip.

Mausgras i bin bruk taim ol wokman bilong museum i wok long senisim ol laip long keis na kamapim asua taim ol i bin holim mask, Antik Ministri long Ijip i tok.

Tasol Christian Eckmann, wanpela konsevesen man bilong Gemani i tok asua i no bikipela tumas.

Em i tok taim ol i bin painim mask long 1924, mausgras i no bin stap olsem hap bilong mask, tasol long 1941 ol i bin kisim dispela mausgras i kam long Ijip na ol i bin putim wantaim.



Mask bilong mangi king bilong Ijip, King Tutankhamun.
Poto: Intanet

Ol poto nabaut



NUPELA EMBASEDA BILONG INDONESIA: Gren Sif na Gavana Jenerel bilong PNG, Sir Michael Ogio i sekanim nupela ambaseda bilong Indonesia long PNG, Ronald Josef Pariaman Manik, long Gavman Haus long Janueri 22. Mista Manik i bin prisenim leta bilong Presiden bilong Indonesia, Joko Widodo. **Poto: Gavana Jenerel Midia**



SMART ECONOMICS KOS: Ol lain i sindaun long Smart Economics trening long Pasifik Edventis Yunivesiti long las wik. Smart Economics em i 5-pela de trening we PSI/PNG i ofaim long helpim pipel i lainim ol besik bisnis plen, rot long sevimi mani na bihain, go insait long bikipela bisnis.



EDUKESAN NA SKOLASIP: 4-PELA pipel long poto i stap na wok long Manus i winim skolasip bilong Australia long go stadi long hap long dispela yia. Bikos long Manus Asailam sika ditensen senta bilong Australia i stap long Manus Provins, Australia i helpim provins long ol eria bilong edukesen, helt, ol infrastaksa na ol arapela eria. **Poto: Australia Hai Komisn Midia**

Raun wantaim Kanage olgeta wik

Tingim bipo...

Kanage em sif fada lo Togoba Mile lo Hagen lo Westen Hilan, em sindaun wantaim meri blon em arere long paia taim hevi ren pundaun. Kanage stap les na stat hatim bel bilong lapun meri "sore bipo taim blo mi, mi bin gat planti gelpren. Ol blo Mosbi, Samatex, Buka, Tolai na Manus!" Lapun meri kirap isi isi tasol na tok, aiya mi lukim kapiak fran lo haus na mi tingim bipo Petrus rausim bicycle plastic na i wilwilim mi lo hap!" Kanage kirap tasol kisim tamiok go silipim kapiak go daun na tok lo kapiak diwai, "Patet! yu sa stap na bringim memories blo bipo kam ya!"

Sir Trooks, Togoba Mile, Hagen. WHP.

Kanage i ranawe long dai

Kanage i kisim bikipela sik tru long namel bilong tupela lek bilong en. Sori tru long Kanage i pilim hat tru long sanap stret na long wokabaut. Na em i slip long bet tasol istap na wanpela dokta i kam lukim em na giamanim Kanage na i tok olsem, sori Kanage yu i gat 3-pela minit tasol i stap bihain yu dai. Na Kanage i wari nogut tru na em i mekim ol las toktok bipo em bai dai.



Tasol dispela taim wanpela kon man tu i kam na i tokim Kanage, mi lukim sik bilong yu, na rabim sili o lombo long dispela hap we em i solap long en. Sori Kanage i ting tru na em i rabim lombo long dispela ples we em i gat sik long en.

Tasol yu save lombo em i kukim em nogut tru na man ya i kisim bikipela bagarap, na em i kalap kalap i go sindaun long wanpela liklik wara na em pilim orait na em i tok olsem, Dokta i tok mi gat 3-pela minit lep bipo mi dai ya.

Tasol laki na sili o lombo i kukim sik bilong na mi ran i go long wara sindaun na 3-pela minis i go pinis na mi no dai. Tenkyu tu long sili o lombo yu mekim na ranawe long dai, sapos nogat em mi dai pinis. Kanage ting em i ranawe long dai.

Kopeng Andrew

Kanage i Kapupu...

Kanage em i bilong ples Kwip long WHP, wanpela Sarere em i dring hombru i go tulait na moning em i Sande so Kanage i go Lotu.

Em i go sindaun namel stret long Haus Lotu. Taim pasta i wok long autim tok yet na Kanage em i slip pinis. Kanage ting em i slip long haus bilong em yet na em i apim hap lek bilong em i go antap na em i blowing bikipela Kapupu stret na olgeta lain i stap long haus lotu i harim na olgeta i lukluk i go long Kanage.

Kanage em yet tu i guria na i opim ai na lukluk. Tasol em i lukim olgeta ai kam long Kanage tasol, na Kanage i kirap tok olsem, hey, lukluk long pasta, mi autim tok long hia na yupela lukluk long mi a? Sem bilong yupela!

Andrew Braun

Ol skwat!
Salim ol gutpela Kanage
tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Mi gat wari na mi laik helpim

Dia Laipain
MERI bilong mi na 3-pela pikinini bilong i lusim mi na ol i go stap longwe long ples, tasol mi no lukim o ringim ol na i no save ol stap orait o no gat.

Mi bin painim dispela meri long kolis na mitupela i marit taim mi gat 29 krismas krismas na stap wantaim em inap nau mi gat 30 krismas.

Wanpela taim mi stap long wok na kam bel long lukim famili i karim olgeta kago na lusim haus.

Narapela de mi ring na painim olsem meri na pikinini i go pinis long ples. Meri i haitim ol pikinini na tu, em i no toktok gut long mi.

Mi traim na tokim ol polis long kisim ol pikinini i kam bek long mi, tasol em i no inap. Mi stap long wanpela mun long stretim dispela hevi.

Mi painim olsem em i hat long lukim ol pikinini na mi go bek long taun wantaim wari na sore i pulap long mi bikos mi laik lukim ol.

Mi stap long taun na mi wok na mi hetpen long tingim wanem kain pasin stret mi wokim na meri pikinini i ronawe long mi. Mi yet mi painimaut olsem mi save dring bia na mi save patim em na krosim em tumas.

Mi save olsem em i stap long ples bilong mi na no wari tumas long wanpela samting long sait bilong mani.

Mi wokim bikipela haus kapa na wanpela stoa bilong ol. Tu, mi baim wanpela ilektrik jenereta long helpm gut sindaun na lukautim pikinini, na stap long ples.

Meri bilong mi tu save wok long wanpela edpos long ples na mi ting olsem em i stap gut na lukautim ol pikinini i stap.

Mi save stap long taun na wok na olgeta wiken mi save go na stap wantaim ol long ples.

Wanpela bikipela hevi i stap namel long mipela long sait bilong mani na rot we mipela i save yusim.

Mi save yusim long laik bilong mi long baim bia na i no toksave long meri bilong mi long amas mi save kisim long pei bilong mi. Em tu i no



save tokim mi hamas em i ken yusim long lukautim ol pikinini.

Wari bilong mi long nau em i olsem, mi stap auasait long mama pikinini long 2-pela yia na painim hat long stap mi yet.

Mi no stap gut olsem mi save stap bipo we kainkain tingting i save kisim mi olsem mi bai lukim ol pikinini wantaim meri bilong mi gen o no gat.

Mi harim long sampela lain olsem meri bilong mi laik maritim nupela man na tingting bilong mi i go bagarap. Taim mi harim laik we meri bilong mi i gat long mi i wok long go daun na em i isi lus tingting long mi.

Mi lusim olgeta samting na mi stat long go lotu long Bikman na pret long em long givim wanpela gutpela meri bai lukautim mi.

Mi kisim skolasip pinis long kisim digri. Ting ting bilong mi em olsem, mi laik kisim gutpela wok na maritim gutpela meri, na stap amama long taim mi bungim dai bilong mi.

Mi ken maritim nupela meri tasol bai mi helpim ol pikinini long skul fi na ol arapela samting ol i laikim long en.

Nau yet, mi gat wanpela pon pren i stap we em i save lotu tu na mitupela i wok long salim meses i go kam, tasol mi no lukim pes bilong em yet.

Laipain, plis inap yu helpim mi wantaim sampela tingting long dau-nim dispela hevi?

Dia Pren

I gutpela yu serim wari bilong yu wantaim mipela we mipela bai helpim yu long stretim sindaun bilong yu.

Sori long yu gen olsem meri bilong yu i lusim yu na i go wantaim ol pikinini taim yu no gat we long save ol pikinini i stap olsem wanem.

Mipela i amamas long yu long yu luksave long ol no gut pasin bilong yu na yu senisim na kisim Bikman long laip bilong yu olsem King na Sevia bilong yu.

Sori long meri bilong yu olsem em i pilim hevi long laip bilong em taim em i stap wantaim yu na wokim disisen long lusim yu.

Em i no gutpela long no toksasve long yu olsem em i go, tasol dispela i soim olsem em i no moa trastim yu olsem man bilong em.

Mipela i putim aut ol tingting we bai yu lukim na skelim wanem em i gutpela long stretim sindaun bilong yu.

Mipela i no fosim yu long bihainim tingting bilong mipela, tasol yu yet i ken painimaut wanem samting bai helpim yu long stretim hevi bilong yu.

Yu mas painim rot long lukim welfe opis long provins bilong yu long traim helpim yu. Ol bai painim aut we long yu i ken lukim ol pikinini.

No ken bekim bek pasin meri bilong yu i mekim.

Yu mast tok sori long meri bilong yu long wanem ol no gut em mekim na lusim rong bilong em.

Yu mas olgeta taim askim bel isi bilong Bikman we yu bai no inap tingting moa long ol hevi bilong yu.

Yu mas rausim ol hevi tingting i stap long tingting bilong yu bikos dispela i ken givim sik long yu. Yu mas prea planti taim long bikman na tu, joinim taim bilong wokim YOGA wantem Siti Famasi long helpim bodi na main bilong yu.

Pren bilong yu,
Laipain

Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu. Laipain

Madang baio disel projek kisim K2.3 milien helpim

James G. Kila i raitim

OL PIPEL bilong Karkar Ailan long Sumkar Distrik long Madang provins i amamas long disisen bilong nesenel gav-

man long sapotim wok bilong baio-disel fiul projek yusim kokonas.

Nesenel gavman i soim sapot bilong en long namba wan baio disel projek long Madang provins na i givim K2.3 milien.



Poto: Baio disel projek i gutpela nius long ol Madang kokonas fama.

Komo ples balus bai kisim komesel flait

Stanley Nondol i raitim

KOMO ples balus long Hela provins bai kisim ol komesel flait long sapotim egrikalsa bisnis na helpim ol soldia long givim rilif saplai long taim bilong disasta.

Minista bilong Sivil Aviesen, Steven Davis na Menesing Dairekta bilong Exxon Mobil Andrew Barry i sainim agrimen long yusim Komo ples balus long ol komesel flait long dispela wik Mande long Pot Mosbi.

Komo ples balus em bikpela ples balus long Sauten Hemispe wantaim 3.2 kilomita.

Exxon Mobil i wok dispela ples balus long helpim long ol development bilong PNG LNG projek na karim ol kago i go insait long LNG konstraksen eria. Taim konstraksen i pinis na kantri i salim ges long wol maket, Exxon Mobil i patna wantaim gavman long givim ples

balus i go long han bilong Nesenel Airpot Koporesen long menesim.

Praim Minista Peter O'Neill i tok Komop ples balus em bai helpim ol fama na ol kampani long kisim ol egrikalsa krop i go aut long ol maket long narapela senta.

Mista O'Neill i tok Komo em gutpela ples long gavman i ken yusim olsem senta bilong givim ol rilif salai i go long ol ples na manmeri long narapela hap i kisim taim long taim hevi bilong nesurel disasta.

Em i tok ol Difens Fos bai yusim ples balus long hap long mekim dispela wok taim nid i kamap.

Praim Minista Peter O'Neill i tok namba wan komesel flait bai go long Komo long namel bilong pinis bilong Februari na stat bilong mun Mas, 2014 bihain long sampela wok bilong stretim ples balus i pinis.

Komo ples balus em winim Jackson ples balus long Mosbi na ol arapela bikpela ples balus long Australia.

Ol bikpela balus long wol i ken pundaun long Komo. Ples balus em bilong Exxon Mobil na Nesenel Epot Komoresen (NAC) bai menesim.

Praim Minista O'Neill i tok tenkyu long Exxon Mobil long hatwok bilong ol long wokim bikpela ples balus na i givim i kam bek long kantri bai kisim sevis.

Mista O'Neill i tok PNG LNG projek i givim planti sevis na wanpela bilong em i tanim ges i go long pawa na givim saplai long Hela provins na Pot Mosbi siti.

Ol balus long wol olsem Hercules L382 bai pundaun long Komo ples balus wantaim ol balus bilong Air Niugini olsem Dash 8, Fokker 100, na ol arapela liklik balus raun long kantri.



POTO Komo ples balus. Piksa em long taim bilong LNG konstraksen, wok i pinis nap les balus i redi long bikpela balus na ol komesel flait.

Minista bilong Nesenel Plening na Monitoring, Charles Abel long long mun Disemba las yia tasol i givim K2.3 milien long Madang provinsal gavman long baim wanpela sip long sapotim ol rurel fama long salim kopra na na kamapim baio disel fiul long Karkar Ailan long Madang provins.

Dispela em namba wan nupela kain projek stret we kopra bai kamapim disel long ranim ol kar long Madang provins.

Mista Abel i givim sek mani i go long Gavana bilong Madang Jim Kas, na i tok gavman i laik wokim ol samting insait long kantri yet long helpim ol liklik fama long ples, na dispela baio disel projek long Karkar Ailan em i wanpela gutpela rot.

Dispela mani bai go long baim nupela kain sip aninit long Nesenel Risponsibol Sasteinebol Developmen Progam long sapotim Madang baio disel projek. Dispela sip em i nupela kain stret we ol bai wokim long bihainim ol lain sistem bilong PNG.

Wanpela kampani bilong Holland nem bilong en Asia Ships, i wokim dispela sip long mekim wok insait long baio disel projek, na lonsing bilong en bai kamap long neks yia.

Mista Abel i tok dispela baio disel projek bai sapotim ol kopra groa long Madang long kisim gutpela prais long kopra bilong en na tu, bai tanim kopra i go kamap disel na tu mekim kopra i kamap olsem disel prais.

Em i tokaut tu olsem dispela baio disel bai mekim prais bilong disel i go daun na bai helpim PNG Power long Madang na tu, ol bai yusim dispela kopra disel long ol kar bilong Madang provinsal gavman.

Minista i tok nupela sip em bai ol i yusim long karim kopra na tu helpim ol pasindia i go olsem long Karkar, Bagabag, Long Ailan, Saidor na ol ples long Raikos.

Em i tok dispela projek em gutpela na smatpela piksa stret long go wantaim Nesenel Strateji bilong Sasteinebol Developmen. Minista Abel i tok planti taim kantri i save salim ol samting bilong en i go long ovasis long kamapim ol samting na bihain PNG i save baim gen. Dispela pasin i lukim kantri i salim wok bilong en na velyu bilong prodak bilong en i go long ol ausait lain.

Em i tok PNG i ken kamapim fiul o disel bilong en yet insait long kantri na kamapim wok bilong ol asples pipel.

Gavman i sapotim egrikalsa sekta

OIL, ges na mineral long kantri bai pinis wanpela taim tasol egrikalsa em bai stap wantaim ol pipel na bai sapotim planti tumbuna lain long bihain taim.

Dispela em toktok bilong Praim Minista Peter O'Neill taim em lonsim PNG kakao program las wik Fraide long Mutzing stesen lon Markham distrik long Morobe provins.

Praim Minista i tok oil, ges, gol. Kopa, na ol mineral long maining senta long kantri bai pinis wanpela taim tasol egrikalsa samting olsem kakao, kopra, kopi, kari, na ol samting i gro long graun na yu ken planim gen long graun na kamapim kaikai bai stap yet wantaim ol pipel.

Long Papua Niugini, egrikalsa i sapotim planti milien pipel, planti pipel long ples lain i planim ol gaden kaikai, na salim na kisim mani long sapotim ol yet. Na ol i kaikai tu.

Mista O'Neil i mekim dispela ol toktok i go long planti tausen fama long Morobe provins na tokim ol long holim graun na planim ol samting olsem kakao, kopra na ol arapela kes krop. Em i tok gavman i putim planti milien kina pinis long egrikalsa projek long sapotim ol fama long rurel eria.

Dispela PNG Kakao program em nupela program long kantri na bai helpim planti fama taim wok i kamap long program.

Mista O'Neill i tok gavman i putim planti mani long edukesen, helt, lo na oda na

infrastraksa na wok i kamap orait na i tok egrikalsa em wanpela eria we gavman i putim bikpela milien kina tu na laikim ol pipel i mas wok strong long graun bilong ol long ol yet bai lukim gutpela kaikai i kamap.

Em i tok ol bikpela senis long ples bai no inap kamap hariap long wanpela de tasol gavman bilong em i wok hat long givim sevis long olgeta pipel na wok i kamap gut long olgeta hap long kantri.

Mista O'Neill i tok gavman na pipel i mas wok bung long long kirapim ol egrikalsa wok long sapotim ikonomi bilong kantri. Em i tok gavman bai sapotim ol pipel long kepitol olsem ol wok samting bilong agriklasa na ol pipel i gat gran na i mas wok hat long kirapim sekta.

Mista O'Neill i tok gavman i putim planti milien kina long olgeta distrik long kantri tasol long sampela hap gutpela wok i no kamap bikos ol lida i no mekim wok stret. Em i tok ol lida i mas yusim mani bilong ol pipel gut long givim sevis long ol pipel ol i makim long palamen.

Mista O'Neill i tok lonsing bilong dispela kakao program em i namba wan long egrikalsa sekta na bai sapotim planti manmeri.

Em i tok gavman bilong em i sapotim ol kain program we bai sapotim planti pipel long planti yia.



Poto: Ol Pipel long Markham i wel kamim PM O'Neill.



PIH Saveman Nius

"I kam long Pacific International Hospital Port Moresby"

Ph: 323 4400 Textline 7155 8866 Website: www.pih.com.pg

Modern Maternity Services at the New Pacific International Hospital

**BY DR MATHIAS SAPURI, OL
HEAD OF OBSTETRICS AND
GYNECOLOGY AT THE PACIFIC
INTERNATIONAL HOSPITAL**

THE NEW ERA OF LEVEL 7 TERTIARY HOSPITAL CARE IN PAPUA NEW GUINEA

In just under 2 weeks, The Honourable Prime Minister of Papua New Guinea Hon. Peter O'Neill, CMG, MP will officially launch the new Pacific International Hospital Building at 3 Mile Taurama, and soon we will relocate the current 4 mile facilities to the new hospital

ADVANCED MATERNAL AND GYNECOLOGICAL CARE IN PAPUA NEW GUINEA

I am pleased to inform all our women folk in Papua New Guinea and neighboring Pacific Island Countries that they can now access our upgraded maternity and gynecology services at the new Pacific International Hospital at Taurama at the Rose Wing. The Rose Wing will house the State of the Art Delivery Suites and a beautiful post Natal Ward with semi-private and private rooms. Our team will be introducing painless labour and delivery by introducing epidural anaesthesia services in conjunction with our Anesthetic Department.

A well equipped, first Neonatal Intensive Care Unit in PNG will be located adjacent to the Delivery suite and will be headed by Dr Mary Baki, so you can rest assured that incase your baby requires special care, it will be right available there.

Gynecological diagnosis and surgery will now be possible in a minimal invasive manner with the introduction of keyhole surgery, so there is no big scars and healing and recovery time is faster. With our new state of the art laparoscopic theatre and equipment, we can perform the following procedures; laparoscopic salpingectomies for ectopic pregnancies, laparoscopic ovarian cystectomies, laparoscopic myomectomies, laparoscopic assisted vaginal hysterectomies,



laparoscopic colposuspensions, laparoscopic appendisectomies, laparoscopic biopsies, laparoscopic adhesiolysis, and simple diagnostics laparoscopies. With the new operating theatre facilities and equipment we can perform colposcopies, hysteroscopies, endometrial ablations, LEETZ excisions and many more procedures that we could not perform in the past and we would end up referring these patients overseas.

I am so pleased that with our new histopathology department performing fresh frozen section histology for the first time in PNG I will have the advantage now to decide on the operating table if I am dealing with cancer or benign tumor so that I will be able to offer the appropriate surgical treatment in the first attempt rather than returning back after waiting for biopsy report. This will also help reduce anxiety and morbidity as well as expenses for the patient who will not have to come back in several weeks or months for the report and subsequent surgery. Also, the fact that we will now have an in-house Blood Bank Service right next door to the operating theatre, will put the anesthetist blood pressure at ease knowing that I can do all the major cancer of cervix, cancer of the ovary, cancer of the uterus and all the other gynecological cancers with easy access to blood transfusion, which is at this moment so difficult.

SCREENING FOR EARLY DETECTION OF DISEASES AT ITS BEST IN PAPUA NEW GUINEA

I would like to encourage all our women folk in PNG to get screening and vaccinations. Pap smears to screen for cervical cancer must be done routinely every two years and at the new PIH you can get your result reported in 48 hours. Routine Office ultrasound screening for ovarian tumors, fibroids, and pelvic pathology is encouraged for early detection and treatment. Gardasil vaccination is available in PIH for prevention of cervical cancer. Currently this vaccine is not available in the public health system and therefore all young girls from 9 years of age to young women below 26 years



of age must consider this option. Most countries in the world are using this vaccine including Australia, New Zealand, United States of America and United Kingdom. I encourage all women in PNG to have a mammogram (breast x-ray) every 2 years above the age of 35. Please start routine mammogram screening earlier if you have a strong family history of breast cancer as early detection can save your life.



The new Pathology services at Pacific International Hospital will now be able to offer screening for tumor markers for cancer pre-screening, diagnosis and follow up response to treatment. Examples are CA125, CEA, AFP, BHCG, BRAC1, BRAC2 etc.

PIH MISSION – CONTINUALLY STRIVING TO IMPROVE THE DELIVERY OF ADVANCED HEALTHCARE OPTIONS IN PNG

Finally, time has come for Papua New Guinea to improve the care of its women folk to a level that our women have long deserved but always found wanting. We cannot do the same thing every year and expect maternal mortality and morbidity to improve. We cannot do the same thing every year and expect to improve cervical and breast cancer morbidity and mortality. The time has come for change for the betterment of Women's Health in Papua New Guinea. We can only make you aware and bring you new services, but it's up to you now to take charge of your health and seek out the solutions being made available at the new PIH for a healthy you and your next baby!

Head of Obstetrics and Gynecology at Pacific International Hospital

Senior Consultant Specialist Obstetrician and Gynecologist

Deputy Chairman of the Pacific International Hospital

Chairman of Medical Registration Committee of Papua New Guinea Medical Board. Aopihaus, NDOH, email: msapuri@yahoo.com.au or drsapuripih@gmail.com



- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH !



3 Mile Hill, Taurama Rd, Port Moresby * Call 311-3000 or 323-4400 or text 7155-8866 or email: pihopd@gmail.com



Ramu NiCo bung long 2015 Wok Ripot Konferens

RAMU NiCo Menesmen (MCC) i bung long 2015 Annual Wok Ripot Konferens bilong en long Mande, Januari 6 we i lukim ol sinia lain menesa na ol suprintenden na sinia menesa bilong olgeta dipatmen long KBK Main, Basamuk Rifaineri, Madang Bes na tu Beijing long China i harim toktok yusim video konfrensing.

Nupela Siaman bilong Ramu NiCo, Zong Shaoxing, Presiden Wang Jicheng, Vais Presiden Wang Baowen na Zha Weihang na Hu Zhilian na ol arapela menesmen tim tu i bin sindaun long dispela bikipela miting.

Mista Zha Weihang i go pas long lukautim miting olsem siaman na i tok welkam long olgeta lain na i askim Vais Presiden, Wang Baowen long givim ripot i kam long MCC-Grup annual konferens.

Mista Wang i givim wanem ol tingting na wok em MCC-Grup i laikim long kamap long sait long promotim foapela bisnis lain wok-pen na 8-pela bikipela samting long nupela bisnis plen bilong ol long kamap strong, moa gutpela na bikipela bisnis insat long metal konstraksen operesen insait long wol.

Em i tok prodaksen mak bilong Ramu NiCo bilong dispela yia olsem 83 pesen taim projek wok i stap long karimaut ol test long ol masin na prodaksen wok.

Dispela prodaksen mak kampani i putim i go wantaim wanem samting mama-kampani husat i givim mani long Projek kamap, MCC Grup na ol arapela seaholda tu i laik lukim kamap.

Presiden Wang Jicheng i givim toktok bilong Annual Wok Ripot makim Kampani menesmen tim na i givim rivi ripot bilong long 2014 na glasim ol salens na ol hevi we Kampani i bungim long las yia na tu i toktok long wanem ol bikipela wok-pen Kampani i bai bihainim long muv fowat long 2015.

'Maski olsem Ramu NiCo i wok long bungim planti salens tru long sait long invesmen bilong en long laterait maining na prosesing long PNG, Kampani i

sanap strong yet na go het yet long wok long abrusim na kontrolim ol wok bilong en long lukim kaikai bilong Projek i kamap orait."

Mista Wang i tok prais bilong nikel na kobalt i wok long go daun na tu ol gat ol arapela hevi tu i stap, olsem na Projek bai wokim los long 2015 wantaim ol deficit kontrol mak bilong en, maski olsem em i kamap long 83 pesen disain mak bilong en.

"Long nau yet mipela i bungim ol salens long sait long kwaliti developmen, salens long prosesing, stap bilong tim na menesmen bilong kalsa na ol arapela samting bilong wok,"

Long mekim prodaksen i go antap na bikipela na operesen menesmen level, mipela i kamapim wanpela '12345' menesmen wok-pen long pinisim ol wok we i stap long sait long kes-flo na wok kamap.

Dispela '12345 wok mak' i karamapim menemen bilong mani go we, luksave long kompetisen na helt, sefti na en-vairomen, kamapim ol senis na operesen wok na developmen na kirapim mak bilong prodaksen.

Siaman bilong Ramu NiCo, Mista Zhong long pinisim toktok bilong em i tok Ramu NiCo Projek em fleg o bikipela han-mak bilong MCC Grup na sapos em i kamap gut, em bai wanpela bikipela invesmen bilong wanpela China bisnis autsait long kantri China.

Siaman Zhong wantaim Presiden Wang i askim olgeta wokman meri bilong Ramu NiCo Projek long sanap strong na amamas long wok bilong ol wantaim Projel long bringim kaikai bilong wok i go long ol stekholda na ol i ken luksave long wanem ol helpim Projek i ken bringim.

Presiden Wang i putim aut mak bilong Projek long 'Nogat bagarap i Kamap' long dispela yia, na i laik lukim Komyuniti Afes dipatmen bilong Ramu NiCo i wok klostu wantaim ol autsait stekholda olsem ol papagraun long kamapim gutpela wanbel pasin long lukim wok bilong Projek i go het gut.



Wok lain long Basamuk Rifaineri i stap long konferens.



Wok lain long Beijing i stap long conference.



Ol wok lain long KBK Main i stap long conference.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komyuniti'

Gems i gat ol Embeseda

Nicky Bernard i raitim

GEMS Ogenaising Komiti i tokaut long Trinde olsem ol i makim ol Embeseda bilong 2015 Pasifik Gems.

Dispela tingting long makim ol Embeseda long kamap ol program we bai givim ol pablik man-meri long wok rere bilong wanwan spot ol makim.

GOC Siameri, Emma Waiwai i tok dispela Gems bai givim sans long lainim yumi yet long dispela 28 spot we bai yumi pilai long Pasifik Gems.

Em tok dispela bai mekim yumi luksave gut tru long wan wan spot we bai kamap long Pasifik Gems na bihain long dispela bikipela pilai bai yumi gat save long wan wan spot yumi wok

long bihainim. Na em bai kirapim tingting bilong pilai namel long yumi na tu givim moa luksave long pasin bilong pilai.

Gems Ogenaising Komiti long Atletiks, Komisin i luksave long 10-pela spot manmeri long wan wan spot ol i save pilai long en na makim ol pinis long kamap Embeseda bilong ol.

Mis Waiwai i tok klia long ol dispela Embeseda bai mekim bikipela wok long wan wan spot bilong long mekim klia long pablik olsem ol bai redi long dispela bikipela Pasifik Gems we bai kamap long Julai dispela yia.

Ol foapela Embeseda ol makim pinis em long Vavine Yore (Tas Ragbi) Francis Kompaon (Para-Atletiks) Isikel Tovia Jr (Sofbal) na Lois Garena (Volibal)



POTO KEPSEN: Ol foapela Embeseda i sanap wantaim Siameri bilong GOC Emma Waiwai.

PNGRFL tok amamas long Cabramatta nains tim

Isaac Liri i raitim

SIAMAN bilong Papua Niugini Ragbi Futbal Lig (PNGRFL), Sandis Tsaka, i tok amamas long ragbi nains tim bilong Papua Niugini husat i bin go pilai long Cabramatta nains tonamen long Australia.

“Mi wantaim olgeta wan wok bilong mi long PNGRFL i amamas long olgeta yangpela pilaia na ol kosa na trena husat i bin givim go long dispela tonamen,” Mista Tsaka i tok.

Dispela ragbi nains tim bilong PNG i bin pilai strong tru long ol pul gem bilong ol na winim olgeta bihain long ol i lus long kwata fainel.

Mista Tsaka i tok ol i bin salim wampela yangpela tim i go daun na ol i bin salensim sampela ol bikipela pilaia

tasol ol i bin strong na i go long kwata fainels.

Dispela tonamen i bin lukim 32 tim bilong Australia, na tu, ol arapela kantri i salens.

Mista Tsaka i tok ol mangi bilong yumi i bin givim gutpela salens i go long ol arapela tim, na dispela i bin helpim ol selekta long glasim gut ol pilaia husat i gat gutpela sans long makim PNG long taim bilong Pasifik Gems long Julai.

Em i tok ol dispela yangpela pilaia i bin kisim gutpela ekspirians we bai helpim ol long pilai strong long taim bilong Pasifik Gems, na tu, long taim bihain.

Ragbi nains program em i wampela bikipela program bilong PNGRFL long helpim long kamapim ol gutpela ragbi lig pilaia bilong kantri.

OLGETA spot man na meri i no pilai long Sarere na Sande insait long Nesenel Kapital Distrik bikos bikipela ren i bagarapim ples bilong pilai.

Bikipela gem long Koka Kola kantri, Ipatas Kap long Sauten Lek i lusim trael bilong ol we ol i sapos long

pilai long 9 Mail Mekreka Polis Bareks long Moitaka pilai graun, long Pot Mosbi i no bin pilai bikos bikipela ren i bagarapim ples.

Ol komiti bilong Ipatas Kap long Sauten i no gat tok tok long mekim we ol i kenselim las wiken trael mets na ol i lukluk long ol kompetisen salens tasol.

Kodineta James Ngune i tok nau ol i lukim ol salens long wanem plen bilong ol i bagarap pinis long dispela bikipela ren.

Em i tok i gat 20 tim i stap tasol 10-pela tim bai makim lsten sait na narapela 10-pela bai makim western sait long dispela wiken. “I gat tupela pul i stap bihain long

raun robin mets insait long wan wan pul we tupela tim husat i win bai kisim prais olsem gol pas.” Mista Ngune i tok.

Long dispela tupela tim ol bai skelim ol sko bilong wan wan na sapos ol lukim olsem sapos wampela i kisim planti poin bai winim K10 000.

Foram i kamapim gutpela infomesen bilong ol spot man na meri

FORAM bilong ol spot man na meri i save givim gutpela infomesen long ol spot man na meri bilong Papua Niugini.

Em tu i wampela gutpela hap long wan wan ol spot man na meri long kantri long luksave long ol yet long taim bilong trening na lukim ol taim bilong resis pilai.

Long dispela yia, dispela bung i kamap long Holide Inn hotel long Pot Mosbi, long las mun we ol spot man na meri toktok long ol i kisim trening bilong makim dispela kantri.

Namel long dispela bung em Minista Bilong Spots na memba bilong Mosbi Saut, Justin Tkatchenko, Tim PNG Sep de Mission, Richard Kassman, Helt na Nutrisen spesilis Joanna McCormack bilong Griffith Yunivesiti bilong Australia i stap.

Mista Tkatchenko i strongim ol spot man na meri husat bai pilai long makim kantri long ol i mas tingting strong na wok hat long wan wan spot we ol bai pilai long em na kamap bes pilaia long kantri we wol

i ken luksave. Na em tu i strongim ol long pilai long ol klap gem o yusim ol spot pilai insait long lokol komyuniti long makim rot bilong ol long kamap namba wan.

“Noken abrusim sans bilong yupela. Planti ol spot man na meri i no save pilai long as ples bilong ol yet we ol wantok bilong ol save sindaun na sapotim ol.

Nau yupela i gat sans long pilai long kantri bilong yupela yet bai ol wanlain bilong yupela bai i lukim.” Mista Tkatencho i tok.

Kassman tu i givim

wankaim toktok long ol spot man na meri na em i tok olsem em i laik lukim gutpela resal bihain long gem i pinis.

“Yupela i mas amamas olsem yupela Tim PNG raun gut wantaim gutpela pasin was long tok tok na eksen yupela i mekim long haus, trening eria o long pilai graun.” Kassman i tok.

Em i tok em laikim ol PNG spot man na meri long soim pasin na kala long ektivitis na wok ol i mekim long givim gutpela save long narapela, narapela.

Big range of perfumes and aftershaves available.

Buy your sweetheart
Tabu perfume for

Valentines Day 14 Feb

Good Products, Better Prices, ikam long



Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg






Poto 1: Top C tim long 2014 wantaim tropi bilong ol.
Poto 2: Namba tu yangpela pilaia bilong 2014.
Poto: Nicky Bernard



Poto 3-5: PNG Olimpik Komiti



TOKSAVE: Salim ol spots dro bilong yu kam long Feks; 325 2579, e-mel; sporwol@wantok.com.pg o kam lusim long Wantok Niuspepa opis long Able Building Complex long Central Waigani, NCD.

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna

Emi tuna
bilong PNG



Moa mit na
oil insait



Manufactured by:



RD Tuna Canners Ltd.



TUNA IN OIL

Sempion bilong 2014 BSA bik tebol snuka



Long poto: Yangpela pilai bilong 2014 Emmanuel Kapi, top meri pilaia bilong 2014 Helen Samuel, Minista bilong Spot Pasifik Gems na Nesenel Iven Justin Tkatchenko, namba wan PNG referi long go long Ovasis na ref Jonathan Cavanagh na Pot Mosbi BSA Presiden na Vais Presiden bilong PNG BSA, Roger Wilson,. Stori na Poto Nicky Bernard

POT Mosbi BSA resis bilong bikipela tebol snuka long yia i go pinis, i bin mekim presentesen bilong ol long las wik Fonde. Dispela resis bilong bikipela tebol snuka bin karamapim tripela provins insait long kantri.

Resis bin stap long Kavieng long Niu Ailan Provins, Alotau long Milen Bei Provins na bikipela siti long Pot Mosbi, NCD.

Long pinis bilong dispela resis pilai, planti tim bin kisim luksave long pilai bilong ol na planti manmeri na yangpela tu bin kisim luksave long stail pilai bilong ol.

Top meri pilaia bilong 2014 em Helen Samuel bin kisim taim em resis wantaim narapela tupela stail meri long Best meri pilaia bilong yia.

Yangpela Emmanuel Kapi kisim best yangpela pilaia bilong yia na dispela tropi bilong em i givim go long nem bilong papa bilong em Leit Sir, Mari Kapi husat save lainim em long pilai.

Top man pilaia bilong yia i go long Marcus NgU-Wern bilong Pot Mosbi. Marcus bin winim planti pilai bilong em na tu planti awod long gutpela pilai bilong em.

Dispela yia bai ol kamapim gen resis taim ol kisim ol sponsa bilong ol na em bai strongpela yia tu long wanem olgeta tim na wanwan manmeri bai traim long kamapim nem bilong ol long winim dispela taitol.

Minista bilong Spot Pasifik Gems na Nesenel Iven Justin Tkatchenko i tok bikipela tebol snuka em gutpela pilai na em bai traim long mekim go bikipela insait long kantri.

Maski dispela resis bai no inap stap insait long 2015 Pasifik Gems dispela yia, tasol em bai helpim long em i mas gat lusave long dispela pilai long bihain taim.

Featured Products



Pharmasyntez TB Drugs Effective Treatment of TB at an affordable price.

Good Products, Better Prices, ikam long



Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg